



REGIONE AUTÒNOMA DE SARDIGNA  
REGIONE AUTONOMA DELLA SARDEGNA



COMUNU DE SESTU  
TZITADI METROPOLITANA DE CASTEDDU



*Ddu sciiast?*

**Su fogu eredadi de su tempus passau: is festas de is tres santus in Sestu.**

Su cultu in onori de Santu Antoni est testimongiau in Sestu fintzas de s'acabu de su Cincuxentus, candu duus sestesus iant lassau dinai in eredadi po apariciai missa a su santu. Po cantu pertocat sa festa, intamis, sa primu testimònia est de sa segunda perra de su Sexentus e fintzas a is primus annus de su Noixentus si faiat su fogu acanta de su ponti de s'arriu Matzeu. Sa dii a pustis, candu su fogu si ndi fiat sturau, is fèminas scruculliant in su cinixu po agatai is muntzionis (cantus de linna abruxada) de allogai e imperai cumentu arremèdiu po su siàgori, est a nai cussa maladia chi in italianu si narat *carbonchio*. Cussa de Santu Antoni fiat càpia me is tres festas friarosas, candu, a intru de una cida, si alluiat su fogu fintzas po Sant'Efis, su 14 de gennàrgiu, e po Santu Srebastianu, su 19.

Po Sant'Efis, in prus de su fogadoni, chi si faiat acanta de su ponti de ferru, e de sa festa cun papara de fai e lardu de sa vigilia, sa dii de su 15 si fiat missa manna e si portaiat sa stàtua in prucessioni acumpangiada de is gòcius. Fintzas custu fogu po malasorti, in Sestu, "s'est sturau" antis de sa Primu gherra mundiali. S'obreria po custu santu in bidde est nàscia a s'acabu de su Sexentus, pagu annus a pustis de sa promissa chi is casteddajus iant fatu po s'intercessioni de su "màrtiri gloriosu" chi iat firmau sa pesti.

Sorti mellus at tentu su fogu po Santu Srebastianu. Custu santu puru est adorau in Sestu de tempus meda, difatis sa crèsia a issu dedicata est testimongiada giai in su Cincuxentus. Custu fàbricu s'agatàt a foras de sa bidde, in unu giassu càpiu intru de bia Santu Millanu e bia Aldo Moro, e est abarrau strantaxu a su mancu fintzas a su 1761, candu dd'iant scunsagrau. Po sa festa is carradoris portant a bidde sa linna chi beniat pigada in is montis de su Partiolla e ammuntonada cun una mata de aràngiu carriga de fruta a pitzus. Custu fogadoni puru at arriscau de sparessi ca de is annus Sessanta de su sèculu passau non s'est allutu prus fintzas a su 2004 candu s'assòtziu de Is Mustayonis e s'Orku Foresu, impari cun is autoridadis tzivilis e religiosas ant decìdiu de torrai a apariciai sa festa antiga.



REGIONE AUTÒNOMA DE SARDIGNA  
REGIONE AUTONOMA DELLA SARDEGNA



COMUNU DE SESTU  
TZITADI METROPOLITANA DE CASTEDDU



*Ddu sciiast?*



# SU FOGU EREDADI DE SU TEMPUS PASSAU

is festas de is tres santus  
in Sestu